


宋元明清傳記
資料叢刊系列

宋代傳記 資料叢刊

本社影印室 輯

北京圖書館出版社



宋代傳記 資料叢刊

本社影印室輯

9

北京圖書館出版社

宋·王禹偁 撰

東都事略·列傳

卷一—四九

清光緒九年（一八八三）淮南書局刻本

東都事略卷第十八

承議郎新權知龍州軍州兼管內勸農事管界邊都巡檢使借紫臣稱上進

列傳一

范質字文素大名宗城人也母張氏夢人授五色筆而質生九歲善屬文唐長興中舉進士爲忠武軍推官晉天福中懷其文見宰相桑維翰維翰奇之擢監察御史稍遷主客員外郎直史館召入翰林爲學士契丹入寇晉出帝命質五將出征是夕質宿直出帝命諸學士分草制質曰宮城已閉慮泄機事遂獨爲之辭理優贍當時文士皆歎伏周太祖征李守貞每朝廷遣使齎詔處分軍事皆中機會太祖問誰爲此辭使者以質對太祖曰宰相器也太祖起兵入京師遽令草太后詔及議迎湘陰公儀注乃白太后以質爲兵部侍郎樞密副使周廣順初拜中書

侍郎同中書門下平章事集賢殿大學士兼參知樞密院事世宗時累加司徒洪文館大學士恭帝即位封蕭國公北邊奏太原劉承鈞結契丹入寇乃命我太祖北征爲六師推戴自陳橋入城還府第時質方就食閤中聞太祖入率王溥魏仁浦就府謁見質執溥手曰倉卒遣將吾儕之罪也爪入溥手幾出血溥無語旣見太祖質曰先帝養太尉如子今身未冷奈何太祖性仁厚嗚咽流涕曰吾受世宗厚恩今爲六軍所逼一旦至此將若之何軍校羅彥環按劒厲聲向質曰我輩無主今日須得天子太祖吐之不退質知勢不可遏曰事已爾無太倉卒自古帝王有禮位之禮今可行也因具陳之且曰太尉旣以禮受禮則事太后如母養少主如子無負先帝舊恩太祖揮涕許諾然後率百官成禮太祖由此深敬重質太

祖既即位加兼侍中仍以爲相乾德初封魯國公二年罷爲太子太傅卒年五十四贈中書令初和凝知貢舉愛質所試文自以中第在第十三故亦以處質其後質官及封國皆與凝同當時謂之傳衣鉢 太宗嘗言近世輔弼循規矩惜名器持廉節無與質比者但欠世宗一死爲可惜尔子旻兄子杲

旻字貴參以父任爲千牛備身 國初爲度支員外郎知開封縣 太宗爲開封尹頗器重之領南平知邕州知淮南轉運事太宗時爲三司副使累官給事中判三司坐擅帑竹木入官爲王仁贍所發貶房州司戶參軍移唐州以卒年四十六

杲字師回力學有文 太宗時由鄧州從事爲直史館歷左拾遺補闕擢知制誥以工部郎中罷知壽州復爲知制誥當遷翰林學士 太宗以其躁競不使居內職出爲右諫議大夫知濠

州召爲史館修撰至京師而卒年五十六

王溥字齊物并州祁人也漢乾祐中舉進士甲科李守貞據河中趙思綰反京兆王景崇亂鳳翔周太祖將兵討三叛以溥爲從事三叛旣平朝士及藩鎮嘗以書往來詞意涉于悖逆者太祖籍其名欲按之溥諫曰魑魅伺夜而出日月旣照則氛沴消矣請焚之以安反側太祖從之太祖將大漸促召學士草制以溥爲中書侍郎同中書門下平章事已宣制太祖曰吾無恨矣世宗嘗問漢相李崧蠟彈書結北虜有記其辭者崧曰使崧有此肯示人耶蘇逢吉輩陷之爾世宗遂優贈崧官世宗將討秦鳳溥薦向拱遂平之世宗因宴酌卮酒賜之曰成吾邊功卿擇帥之力也恭帝即位加尚書右僕射國初進位司空乾德二年罷爲太子太保加太子太傅開寶二年遷太子太師太平

興國初封祁國公卒年六十一贈侍中諡曰文獻後以溥諡同
僖祖改諡文康溥在相位日父祚以宿州防禦使家居每公卿
至必謁祚引觴爲壽溥侍側坐客不敢安席祚曰此豚犬尔不
煩諸君起人稱其孝敬子貽孫貽正貽正官至國子博士貽正
之子克明尚太宗女鄭國長公主賜名貽永令與父同行
貽孫字象賢顯德中溥在相位以貽孫爲著作郎國初遷金
部員外郎溥藏書至萬卷貽孫徧覽之太祖嘗問趙普拜禮
何以男子跪而婦人不跪普訪禮官無知者貽孫曰古詩云長
跪問故夫即婦人古亦跪也唐武后時婦人始拜而不跪普問
所出對曰唐幽州從事張建章著渤海記備言之普歎伏貽孫
累遷右司郎中以卒

貽永字季長真宗以其故相家也選尚主除右衛將軍駙馬

都尉明年主薨貽永累遷右監門衛大將軍蔣州團練使請試
郡得知單州徙徐州是時河決貽永作隄城南以禦水患詔
褒之仁宗即位改衛州團練使知澶州遷懷州防禦使拜耀
州觀察使歷彰化武定軍留後拜彰德軍節度使知天雄軍改
鎮保寧知鄆州自咸平中徙城而故治爲通衢密邇梁山洎春
夏多病涉貽永相地築東西道三十餘里至今人獲其濟徙定
州成德軍康定元年擢同知樞密院事改副使加宣徽南院使
拜樞密使慶厯六年加同平章事明年封遂國公加兼侍中改
鎮海軍節度使封鄧國公貽永以寵祿過盛願解樞柄乃聽罷
侍中徙鎮彰德復以疾求去位除尚書右僕射兼侍中景靈宮
使卒年七十一贈太師中書令謚曰康靖貽永性謹約寡言無
綺羅聲色之好惟養鵠鵠數十愛翫而已

魏仁浦字道濟衛州汲人也少爲刀筆吏隸樞密院周太祖爲樞密使問以卒乘數仁浦對曰帶甲者六萬太祖喜曰天下事不足憂也漢隱帝遣使害太祖仁浦曰公有大功於朝廷握彊兵臨重鎮以讒見疑豈可坐而待死教以易其語云誅將士以激怒心太祖納其言遂長驅度河及即位以爲樞密承旨世宗時爲樞密副使陞樞密使拜中書侍郎同中書門下平章事集賢殿大學士兼樞密使始議者以仁浦不由科第進世宗曰顧才如何爾遂用之恭帝嗣位加刑部尚書國初進位右僕射乾德初罷開寶二年春宴太祖笑謂仁浦曰何不勸朕酒乎仁浦奉觴上壽太祖密謂之曰朕欲征太原如何仁浦曰欲速不達太祖頷之從征太原至梁侯驛遇疾而卒仁浦性寬厚接士有禮專務以德報怨世宗卞急輕殺戮仁浦營救而免

者十常七八從出征鋒鏑之下而無一人橫死者有鄭元昭者爲解州刺史仁浦婦翁李溫玉爲推鹽使元昭不得專其利乃誣溫玉之子從李守貞叛捕以告變欲中傷仁浦周太祖爲辨其誣獲免及仁浦大用乃以元昭典五郡又嘗爲賈延徽譖幾遇禍揔師出征有得延徽以獻者仁浦曰因兵戈以報怨不忍爲也人稱其長者謚曰宣懿後以子咸信尚主追封齊王

咸信字國寶

國初

昭憲皇后嘗至仁浦第見咸信奇之開

寶中 太宗尹京以咸信尚永慶公主拜右衛將軍駙馬都尉太平興國初爲吉州防禦使遷觀察使契丹入寇以咸信知澶州拜彰德軍節度使 眞宗即位徙鎮定國武成知曹州改知河陽又知澶州移鎮忠武 眞宗升宋州爲南京以咸信 太祖舊臣加同平章事判天雄軍改鎮保平卒年六十九贈中書

令威信頗知書亦喜待士然性文墨喜規利子昭昞至觀察使
臣稱曰自古治少亂多五代干戈之亂極矣天旣厭亂而思治
故真主勃興此范質王溥仁浦得以講揖遜之禮遂相藝
祖于立國之初而天下晏然也烏呼以伊尹之聖太公之賢皆
以夏商之舊而歸湯文蓋以授受于天者有不庸釋則舍湯文
將安歸乎由是觀之質等所以歸有德爲無嫌也誠與夫賣
國而趨利蒙耻而立朝者有間矣

東都事略卷第十八

東都事略卷第十九

列傳二

韓令坤磁州武安人也令坤少隸周太祖帳下世宗即位爲殿前都虞候高平之戰以功領容州團練使世宗征太原以令坤爲都校以功拜武定軍節度使世宗伐淮甸命令坤等十二將率兵以從襲揚州將吏聞周師至開門以迎之令坤整衆而入市不易肆人甚悅徙鎮鎮安又從世宗北征有功恭帝即位爲侍衛馬步軍都虞候國初移鎮天平加侍衛親軍都指揮使同平章事太祖親征李筠令坤率兵屯河陽澤潞平以功加兼侍中從討李重進改鎮成德卒年四十六令坤有才略識治道與太祖同事周情好親密鎮常山凡七年北邊以寧太祖聞其卒甚悼惜之追封南陽郡王

石守信開封浚儀人也始事周太祖得隸帳下累遷指揮使世宗征河東戰于高平守信以功遷親衛左第一軍都指揮使從征淮南又從征關南俱有戰功自江州防禦使拜義成軍節度使太祖受禪遷侍衛馬步軍副指揮使改鎮歸德李筠反守信與高懷德率前軍破筠衆于長平斬首三千級又與懷德敗其衆三萬于澤州澤潞平以功加同平章事李重進反復命守信討重進兼知揚州行府事太祖親征守信馳奏城中危迫破在昕夕大駕親臨可一鼓而平太祖從之即日克其城移鎮天平兼侍衛馬步軍都指揮使建隆三年請解軍職太祖許之守信每入朝宴賜甚渥加兼侍中太平興國初加中書令爲河南尹從征幽州坐失律責授崇信軍節度使兼中書令尋封衛國公徙鎮陳州卒年五十七贈尚書令追封武威郡王

謚曰武烈子保興保吉

保興字光裔本名保正

太祖爲改之以蔭補供奉官稍遷至

團練使雍熙初契丹寇邊保興爲澶州前軍駐泊徙銀夏綏府都巡檢常巡案罨子砦並黑水河趣谷中戎人數千騎度河邀戰保興伏兵于河許俟其半度急擊之其後數與戎人戰有功積官至棣州防禦使卒年五十八子元孫

保吉字祐之尚

太祖女延慶公主拜左衛將軍駙馬都尉領

愛州刺史以軍功擢至朔州觀察使守信卒起復爲威塞軍節度使知河陽大名府改橫海安國二鎮 眞宗即位徙鎮保平

景德初又徙武寧加同平章事契丹入寇

眞宗將幸澶淵先

遣保吉與李繼隆爲排陣使對壘以待而虜騎數萬至城下保

吉不介馬而馳當其前鋒虜引去旣而虜請盟 眞宗錫宴射

於行營謂繼隆等曰虜自古爲患今得其畏威服義息戰安民皆卿等力也保吉曰臣受命禦寇上冀成筭至於布列行陣指授方略皆出於繼隆繼隆亦曰宣力用心躬率將士臣不如保吉 眞宗嘉其能謙寵賜甚厚改鎮鎮安卒贈中書令謚曰壯武保吉有武幹奕世將相家積不貲而治生射利所至侵擾其鎮大名也葉齊查道皆知名士保吉悉命械頸而督運物論非之先是守信鎮死丘年五十七而卒保吉繼居是鎮及其卒也年復與之同人皆異之

元孫字善長以守信恩補供奉官久之爲閤門祗候遷知京副使累擢至邕州觀察使鄜延路副總管會趙元昊反陷金明砦元孫與劉平戰于三川口爲賊所執 仁宗以爲己死贈忠正軍節度使及元昊納款乃得歸言者請治其辱國之罪 仁宗